

Berita Dari Dunia Islam

Kuwait yang dulunya negeri yang terkebelakang dalam ekonomi, sekarang menjadi negeri yang terkemuka dan maju dengan cepat. Kemajuannya terbit daripada hasil minyak yang boleh membekali 20 peratus daripada minyak-minyak seluruh dunia dan dengan pengeluaran yang ada sekarang boleh berkekalan sehingga 80 tahun. Harga sekarang tidak kurang seratus bilion ringgit Amerika. Hasil daripada minyak yang ada sekarang yang dikeluarkan oleh tiga syarikat minyak 1.6 milion ringgit sehari untuk Kuwait dan cukai hasil sebanyak 545 milion bagi tahun 1964 dan dijangka 609 setahun bagi tahun 1965 dan 1966.

Di sana penduduknya sebanyak 469,000 orang. Lebih separuh daripadanya orang asing yang bekerja dengan syarikat-syarikat minyak dan tidak ada pengangguran.

Kebajikan-kebajikan yang dibuat untuk awam di antara ialah: perubatan percuma, sekolah percuma (termasuk makan percuma tengahari), telefon percuma, sekolah tinggi yang memakan belanja 50 milion ringgit Amerika dan rumah sakit yang memakan belanja 10 milion ringgit Amerika.

Di sana ada seramai seribu orang lebih jutawan dan tidak ada cukai pendapatan dan cukai harta.

* * *

Adalah menjadi khabar yang menggembirakan daripada duta kerajaan 'Arabiyyah Sa'ūdiyyah di Karachi yang menyatakan bahawa *al-Malik al-Mu'aẓẓam Faisal*, Raja bagi 'Arabiyyah Sa'ūdiyyah telah menghadiahkan seribu pound sebagai tambahan kepada dua ribu pound hadiah kepada pertubuhan

orang-orang Islam Jepun. Seribu pound itu digunakan untuk membeli sebidang tanah bagi perkuburan¹ orang-orang Islam di Tokyo.

* * *

Menurut berita "Muslim Warlord" di Karachi bahawa penduduk orang Islam di France tidak kurang 2,500,000 orang dan lebih daripada 200,000 orang adalah hidup di bandar Paris. Sesudah Perang Dunia yang Kedua sebuah masjid telah didirikan di atas sebidang tanah yang diberi oleh kerajaan Perancis sebagai tanda kenang-kenangan kerajaan Perancis kepada beribu-ribu orang Islam yang mati di dalam peperangan di bawah bendera Perancis. Di bahagian masjid itu pula diadakan bahagian-bahagian di antaranya: Bahagian diplomat, kebudayaan dan undang-undang. Di sinilah mereka berhubung dengan dunia Islam seluruhnya dan kepada mereka dapat dihubungi bagi mendapatkan maklumat-maklumat berkaitan Islam.

Kebanyakan orang Islam menjadi pekerja-pekerja di dalam perusahaan motorkar². Banyak juga yang menjadi tukang kayu dan tukang cat.

* * *

Kapal terbang penumpang jet 'Arabiyyah Sa'ūdiyyah bagi kali yang pertamanya mendarat di Istanbul pada 8 Januari sebagai permulaan hubungan penerbangan seminggu sekali di antara Jeddah ('Arabiyyah Sa'ūdiyyah) dan Istanbul. Penerbangan itu dicadangkan tiap-tiap hari Jumaat dan singgah di Amman (Jordan).

* * *

¹ ejaan sepatutnya perkuburan

² ejaan sepatutnya motokar

Kementerian Pertahanan kerajaan Arabiyah Sa‘ūdiyyah mengadakan peruntukan bagi tahun ini sebanyak 300 milion ringgit Amerika bagi tentera darat dan 468 milion Amerika bagi angkatan laut. Amerika Syarikat dan Britain bersama-sama akan membuat bekalan senjata sebanyak 224 milion ringgit Amerika.

* * *

Kementerian Kewangan Pakistan mengisyiharkan bahawa pada 7 dan 8 Februari akan diadakan Peraduan Membaca al-Qur’ān di Karachi. Qari-qari dari Indonesia, Arab Bersatu, ‘Arabiyyah Sa‘ūdiyyah, Iran, Kuwait dan Sudan dijangka akan mengambil bahagian.

* * *

“Keretapi Haji” yang menghubungkan di antara Damsyik dengan Madinah *al-Nabī* adalah dijangka akan dimulai kerjanya tidak lama lagi. Panjangnya 5,500 batu. Kerajaan ‘Arabiyyah Sa‘ūdiyyah, Jordan dan Syria adalah menyokong pembangunan ini bagi memudahkan jemaah-jemaah haji pergi ke Mekah dan Madinah. Keretapi ini boleh digunakan bagi penumpang-penumpang dari utara Eropah Timur ke ‘Arabiyyah Sa‘ūdiyyah bagi kali yang pertama. Perbelanjaan bagi menyempurnakan landasan keretapi ini adalah sebanyak 1,250,000 pound sterling.

* * *

Tempat Persidangan Damai di antara Pakistan dengan India ialah di bandar Tashkent ibu negeri bagi Republik Uzbek iaitu salah sebuah daripada lima belas buah Republik Sosialis yang terkandung di dalam negara Soviet. Penduduknya yang terbanyak ialah orang Islam dan mempunyai sejarah Islam yang lama. Di dalam daerah Uzbek ini ada

lagi dua bandar yang besar iaitu Samarkand dan Bukhara telah pernah menjadi pusat kebudayaan Islam dan pengajian Islam pada zaman yang lampau sebelum Tzar Rusia menakluknya. Bandar Tashkent ialah sebuah bandar yang tua. Luas jajahan Uzbek ini ialah 449,600 kilometer persegi dan berpenduduk sebanyak 9,818,000 orang yang kebanyakannya Islam.

* * *

Dengan perjanjian tolong-menolong di dalam ketenteraan di antara kerajaan Amerika dengan Turki maka Amerika baru-baru ini telah menghantar kapal terbang jet perjuangan sebanyak 26 buah untuk tentera Turki.

* * *

Sebuah tapisan minyak akan didirikan di Kerajaan ‘Arabiyyah Sa‘ūdiyyah tidak berapa lama lagi untuk menapis minyak-minyak mentah dari kerajaan Saudi. Pembangunan ini akan memakan belanja 30 juta riyal dan akan dibangunkan oleh syarikat timur Eropah yang pertama.

* * *

Kerajaan ‘Arabiyyah Sa‘ūdiyyah telah menghadiahkan wang sebanyak 94,000 pound sterling (\$779,000 Malaya) sebagai derma membaiki semula Masjid al-Aqsa di Baitul Maqdis. Belanja untuk membaiki masjid ini dianggarkan 350,000 pound sterling.

* * *

Jalālah al-Malik al-Mu‘azzam Faisal Abdul Aziz al-Sa‘ūd Raja kerajaan ‘Arabiyyah Sa‘ūdiyyah telah melantik 50 orang mubaligh untuk menyiarkan Islam bagi beberapa tempat di Afrika. Gaji-gaji mereka akan dibayar oleh kerajaan Saudi. 30 orang daripada mubaligh itu dilantik dari ulama Saudi dan selainnya 20 orang dari orang-orang

yang bukan Saudi. Mereka akan menghadiri 4 bulan pelajaran dalam bahasa Inggeris dan France bagi memudahkan mereka menjalankan dakwah mereka dengan sebaik-baiknya.

* * *

Ketua-ketua negara-negara Arab akan mengadakan persidangannya di Kaherah pada 14 *March* untuk membincangkan kedudukan-kedudukan dunia Arab sekarang dan menyambung Persidangan Ketua-ketua Negara Arab yang bersidang di Casablanca pada bulan September yang lalu. Dalam Persidangan Negara-negara Arab yang ketiga di Casablangna³ itu telah memutuskan supaya ketua-ketua Arab bersidang dalam bulan *March* tiap-tiap tahun.

* * *

Perselisihan sempadan di antara dua buah negara yang bersaudara, Iraq dan Iran telah dapat persetujuan untuk menyelesaikan perselisihan-perselisihan sempadan yang telah berlaku baru-baru ini — demikian dinyatakan oleh Perdana Menteri Iraq Dr. Abd ar-Rahman al-Bazzaz. Persetujuan didapati bagi menarik tentera kedua-dua belah pihak sejauh yang difikirkan patut dari sempadan, dan menamatkan perperangan dakyah di antara kedua negeri itu serta menubuhkan suatu suruhanjaya bersama-sama merundingkan perihal sempadan.

* * *

Yang Terutama al-Shaykh Abdullah Nashari Rodan Menteri Waqaf kerajaan Kuwait mengisyiharkan bahawa kementeriannya telah menetapkan perbelanjaan bagi tahun 1966-67 sebanyak 200,000 dinar kerana mencetak al-Qur'an al-Karim dan sebahagian kitab-kitab agama bagi dikirim ke negara-negara Afrika. Ini adalah sebagai tambahan kepada bantuan yang ditentukan bagi menolong negara-negara Afrika di dalam hal ehwal agama Islam.

* * *

Di Jerman Barat ada enam buah masjid iaitu Berlin, Frankfurt, Aachen, Hamburg, Schwetzingen dan sebuah lagi akan didirikan di Munich. Di Munich ada 100,000 orang Islam. Tapak bagi membangunkan masjid itu telah dipilih yang luasnya 4,400 meter persegi. Kerajaan 'Arabiyyah Sa'ūdiyyah menghadiahkan 50,000 mark wang Jerman (bersamaan lebih kurang dengan 89,00 riyal Saudi) Jordan menderma sebanyak 60,000 mark dan Kuwait sebanyak 40,000 mark. Derma-derma telah dipungut sebanyak 400,000 mark tetapi belum mencukupi bagi mendirikan masjid yang akan mengadakan tempat-tempat bersyarah, kutub khanah dan rumah tumpangan bagi penuntut-penuntut.

* * *

Bahasa-bahasa Urdu, Arab, dan Turki ialah daripada 25 bahasa asing yang akan dipelajari di New York University mulai dari bulan Februari tahun ini. Pengajian diadakan meliputi bahasa, bercakap, menulis dan persuratannya.

* * *

Sesudah mengadakan beberapa banyak percubaan ke atas kapal terbang buatan Republik Arab Bersatu H.A. 300 maka percubaan akhir sedang disiapkan. Kapal terbang baru ini dilengkapi dengan roket dan *machine-gun* dan adalah lebih kuat dan lebih cepat daripada kapal terbang Israel 4-S. Kapal terbang baru ini direka dan dibuat seluruhnya oleh pakar-pakar Mesir dan barang pengeluaran Mesir sendiri.

* * *

Kerajaan Turki telah mengadakan percubaan menanam pokok-pokok getah. Pokok-pokok getah itu sudah pun ditanam di suatu tempat bernama Karabük. Lima tahun yang akan datang ladang getah dengan permulaan 384 ekar itu akan mencukupi kehendak-kehendak Turki dalam penggunaan getah-getahnya.

³ Perkataan sebenar ialah Casablanca.

takrif mungkin kelak akan menimbulkan perkara-perkara yang tidak diingini dan dengan itu sangat molek takrif diadakan supaya menghalang pengacau-pengacau agama atau golongan-golongan yang mengaku beragama Islam tetapi menyalahi hukum-hukum Islam. Takrif hukum Islam itu ada baiknya kalau dimaknakan ialah **hukum-hukum Islam yang didasarkan di atas al-Qur’ān, hadith (sunnah), ijmak dan qiyas yang muktabar.**

Mufti dan Fatwa.

Di dalam rang undang-undang itu menyatakan bahawa setelah berunding dengan majlis, *President* Singapura akan melantik seorang mufti dan mufti itu ialah seorang *ex-officio* dalam majlis 30 (1) dan 30 (2).

Suatu jawatankuasa yang disebut dalam bahasa Inggerisnya “*Legal Committee*” yang mungkin boleh diterjemahkan dalam perkataan “Jawatankuasa Fatwa” yang mempunyai dua orang ahli daripada majlis dan tidak lebih daripada daripada dua orang yang lainnya yang layak dan berkebolehan yang bukan daripada anggota majlis. Anggota-anggota Jawatankuasa Undang-undang ini, selain daripada mufti hendaklah dilantik oleh *President* Singapura dan mufti adalah menjadi pengurus bagi Jawatankuasa Undang-undang dan *President* Singapura akan melantik seorang lain yang disyorkan namanya oleh majlis sebagai pengurus apabila mufti tidak hadir.

Fatwa-fatwa boleh diminta dari satu ke suatu masa oleh orang ramai menerusi Setiausaha Majlis dan fatwa-fatwa itu akan dipertimbangkan dan majlis itu berhak tidak memberi fatwa kepada masalah-masalah yang remeh atau lain-lain sebab yang tidak munasabah untuk menjawabnya tetapi menyediakan satu rangka fatwa mengenai hal itu. Sekiranya fatwa itu disetui¹ sebulat suara atau ahli

jawatankuasa yang hadir telah mengambil keputusan maka

bolehlah fatwa itu dikeluarkan atas nama majlis. Sekiranya jawatankuasa undang-undang tidak mendapat sebulat suara maka fatwa itu hendaklah dirujukkan kepada majlis yang akan mengeluarkan fatwanya yang mendapat suara terbanyak daripada ahli-ahlinya. Dari satu ke suatu masa majlis boleh membuat fatwanya dan kehendaknya sendiri dan menerbitkan sesuatu fatwa atau penentuan atas sesuatu masalah.

Demikian juga apabila dikehendaki oleh sebarang mahkamah mengenai fatwa atas hukum Islam maka permohonan itu bolehlah diserahkan kepada Jawatankuasa Undang-undang, akan memberikan pendapatnya atas nama majlis menurut suara terbanyak ahli-ahlinya dan mengaku sah atas pendapat itu kepada mahkamah yang memintanya. Fatwa-fatwa yang diberi ghalibnya ialah mengikut *qawl* dalam mazhab Shāfi‘ī tetapi jika difikirkan dengan mengikut *qawl* itu akan berlawanan dengan kepentingan umum maka bolehlah majlis itu mengikuti salah satu mazhab yang diakui dalam syariah Islam yang difikirkan sesuai dengan syarat hendaklah dibutirkan satu persatu.

Jika diperhatikan di dalam soalan yang terkandung di dalam Fasal 30 membawa 33 seorang mufti tidak berhak memberi satu fatwa atas nama mufti melainkan sesudah mendapat suara yang terbanyak dan pula apabila tidak didapati suara yang terbanyak itu hendaklah dirujukkan kepada majlis yang bakal membahas fatwa itu dan mengambil keputusan atas suara yang terbanyak dari ahli majlis dan menjadikannya sebagai suatu fatwa — yang bererti bahawa hukum Islam adalah didasarkan kepada undi — bukan kepada hujah-hujah yang muktabar yang dibahas oleh ahlinya.

Seseorang mufti sepatutnya, ada Badan Penasihat Mufti — bukan jawatankuasa sebagaimana yang dikehendaki

¹ Perkataan sebenar ialah disetujui.

oleh undang-undang itu. Badan Penasihat Mufti itu hendaklah memberi hujah-hujah kepada mufti tetapi tidaklah mufti tertakluk kepada Badan Penasihat Fatwa dan mufti berhak mengeluarkan fatwa atas nama Jawatankuasa Undang-undang ataupun atas nama majlis. Sebab itulah mufti yang dipilih mestilah orang yang cukup faham dan bertanggungjawab. Kalau hak mufti tidak diberi maka tidak mustahak mufti dilantik — memadai sahaja *Lajnah al-Fatwā* yang akan memberi fatwa-fatwa atas nama lujnah itu — tidak atas nama mufti. Ahli-ahlinya hendaklah diambil daripada orang-orang yang berkelayakan dan jika terbit sesuatu yang berhajat kepada keahlian sesuatu perkara maka orang-orang yang ahli dalam soal itu hendaklah dijemput hadir untuk memberi penjelasan-penjelasan kepada masalah yang akan difatwakan itu.

Perkara mengenai 32 (3) yang tersebut mengenai fatwa yang mesti dipatuhi oleh umat Islam Singapura (1960) di dalam Rang Undang-undang (1965) ini telah ditiadakan.

Mahkamah Syariah

Di dalam bahagian 38 ada disebutkan bahawa di dalam perbicaraan itu hendaklah seseorang itu hadir sendiri atau diwakili oleh peguam ataupun wakil yang **diizinkan oleh mahkamah secara umum atau khas.** Perkara ini, menurut pendapat kita boleh kelak menimbulkan perkara-perkara yang bakal tidak diingini apabila mahkamah menahan seseorang menjadi wakil kerana disyaratkan persetujuan mahkamah. Maka perkataan **yang diizinkan oleh mahkamah secara umum atau khas** itu mustahak ditiadakan.

Untuk menjadikan perkara-perkara Islam itu dibicarakan di Mahkamah Syariah sahaja maka perkara-perkara tuntutan nafkah, isteri-isteri dan tanggungjawab yang tersebut di dalam bahagian

7 Piagam Wanita (Undang-undang nombor 18 tahun 1961)

orang-orang Islam hendaklah dikecualikan.

Di dalam Fasal 52 (3) ada menyebut bahawa seseorang perempuan yang telah diceraikan dan yang tidak berhak memperoleh perintah menurut pecahan 53 boleh memohon kepada mahkamah dan mahkamah boleh pula jika ia puas hati bahawa menilik akan semua keadaan di dalam perkara itu mendapati adil dan saksama, mengeluarkan perintah atau hukuman ke atas bekas suaminya supaya menjelaskan apa-apa jua jumlah bagi jangka waktu yang mahkamah fikirkan munasabah. (Bunyi bahagian 53 (2) itu ialah “seorang perempuan yang diceraikan boleh, dengan membuat permohonan kepada mahkamah, mendapat satu hukuman atau perintah, terhadap bekas suaminya supaya membayar bayaran nafkah dan memberi pakaian dan tempat tinggal yang patut mengikut hukum Islam.”)

Yang demikian ini boleh difaham bahawa seseorang perempuan yang diceraikan suaminya yang tidak mendapat sesuatu daripada hukuman syarak, mahkamah boleh memerintahkan bekas suaminya mengadakan bayaran-bayaran yang tertentu kepada bekas isteri yang tidak ada berhak menerima sesuatu daripada hukum syarak.

Ini, menurut pendapat kita, adalah bertentang dengan hukum syarak dan membebankan suatu hukuman yang tidak wajib dibuat ke atas seseorang bekas suami sedang hukum Islam tidak memberatkan yang demikian. Suatu hukuman yang boleh menganiaya seseorang yang tidak diberati oleh syarak.

Di dalam rang undang-undang ini keseluruhannya tidak ada sebarang satu syarat pun mengenai nafkah anak-anak dari suatu perkahwinan dan lain-lain tanggungan bagi keselamatan anak-anak itu diletakkan suatu ketentuan tanggungan nafkah kepada anak-anak itu sehingga suatu masa yang dewasa, bagi

hidupnya dan bayaran-bayaran pelajarannya dan seumpamanya yang bersabit dengannya; tetapi tidak menghukumkan sesuatu bayaran yang bertentangan dengan hukum Islam.

Di dalam 58 (2) ada disebut bahawa majlis boleh mentadbirkan wang dan boleh mendatangkan hasil daripadanya. Kerana ia wang daripada Islam yang mengharamkan riba maka hendaklah ada jaminan bahawa wang-wang yang dikawal oleh majlis itu jangan dicari hasilnya dari riba.

Selain daripada itu kuasa majlis dengan persetujuan menteri boleh membuat peraturan bagi memungut, mentadbir semua wang simpanan 58 (3). Pembahagian harta atau pungutan Islam dengan tidak diberi syarat tentunya tidak sempurna kerana itu patutlah ditentukan dengan syarat "menurut hukum Islam". Jika Islam tidak membenarkan wang itu digunakan kepada sesuatu perkara maka majlis tidaklah boleh menggunakan sekalipun disetujui oleh menteri.

Di dalam 59 (2) — orang Islam faham dan mengetahui ada banyak wakaf-wakaf yang tidak diselenggarakan dengan wajar mengikut wasiat yang berwakaf tetapi bukan semuanya kerana masih banyak orang-orang yang menjalankan wakaf dengan betul. Sebab itu majlis akan mengambil atau menguasai semua wakaf-wakaf am atau khas adalah bertentangan dengan ajaran Islam sebab biasanya yang berwakaf itu melantik pemegangnya dan menentukan orang-orang yang disukainya bagi mengerjakan harta yang diwakafkannya. Sekiranya kuatkuasa itu diambil oleh majlis, bukan sahaja bertentangan dengan syarak, menurut pendapat kita, tetapi akan mengakibatkan orang-orang tidak gemar berwakaf.

Pada keseluruhannya dalam soal mengenai zakat, umat Islam hendaklah mengajinya dengan saksama supaya jangan kerana ada perbuatan-perbuatan seorang berdua melibatkan yang lainnya.

Di dalam Fasal 69 mengenai semua perbelanjaan, saguhati atas perbelanjaan yang ditadbirkan atas harta yang diberi kuasa kepada majlis termasuk belanja menjaga dan memperbaiki harta benda yang tidak bergerak termasuk gaji dan semua perbelanjaan pekerja-pekerja majlis, bayaran dan saguhati yang dibayar kepada pegawai atau ahli majlis kerana khidmatnya akan dibayar daripada wang harta simpanannya (*fund* majlis).

Mungkin orang Islam akan berasa tidak puas hati dengan cara ini kerana adalah memberatkan jika semua dibebankan kepada majlis dan mungkin menghabiskan wang simpanan dan kelak tidak akan didapati untuk peruntukan rancangan yang berfaedah kepada Islam. Kerana itu negara mestilah menanggung gaji-gaji dan biaya semua pekerja-pekerja majlis, dan upah biaya yang patut dibayar kepada pegawai atau anggota majlis kerana khidmatnya yang demikian itu sebagai yang demikian dibebankan di atas simpanan wang negara yang disebut "*consolidated fund*".

Mengenai perbelanjaan, tanggungan dan pentadbiran harta dan kepunyaan yang disyaratkan kepada majlis termasuk belanja menjaga dan memperbaiki harta yang tidak bergerak akan dibayar dari harta dan kepunyaan wang simpanan (*fund* majlis). Kerajaan hendaklah mengadakan peruntukan bagi pertadbiran pegawai-pegawai majlis.

Mengenai Zakat.

Ada dua perkara dalam rang undang-undang ini yang mengenai zakat iaitu zakat fitrah dan zakat harta. Zakat fitrah adalah wajib sebelum sembahyang Hari Raya Puasa dan sesiapa tidak membayarnya dalam masa itu berdosa dan apabila lewat daripada masa itu, tidaklah ia menjadi wajib tetapi hanya sebagai sedekah jua. Zakat fitrah itu diselenggarakan oleh Nabi bagi mengutamakan membantu

orang-orang fakir dan miskin supaya mereka dapat berhari raya bersama-sama saudara-saudaranya yang lain dan itulah peruntukan itu ditentukan masanya sebelum Hari Raya.

Nabi tidak membahagikan pungutan fitrah itu kepada asnaf-asnaf yang lain umpamanya dilebihkan soal *fi sabīli Allāh* — untuk membina madrasah dan sebagainya daripada wang zakat fitrah itu.

Mengenai zakat harta dan zakat perniagaan dikehendaki jaminan sebelum dilaksanakan undang-undang ini hendaklah disusun dengan sempurna peraturan-peraturannya supaya tidak sebahagian sahaja dikenakan dan sebahagian lain tidak dikenakan — yang dituju hanya orang-orang yang berharta dan orang-orang yang bermiaga tetapi meninggalkan harta-harta yang disimpan oleh orang perseorangan yang wajib zakat atasnya. Umpamanya tiap-tiap pekerja, menurut peraturan negeri menerima *provident fund*, dari majikan dan daripada wangnya sendiri. Wang itu adalah haknya dan tersimpan di dalam *central provident fund*. Setengah-setengahnya ada mempunyai simpanan berpuluhan-puluhan ribu tetapi zakatnya tidak dikeluarkan padahal wang simpanan itu adalah hak miliknya yang wajib dikeluarkan zakatnya pada tiap-tiap tahun.

Masjid dan Sekolah-sekolah Agama

Di dalam Ceraian 75 dalam rang undang-undang ini terang disebut bahawa semua masjid akan diletakkan di bawah kuasa majlis. Sekiranya nazir-nazir yang berkuasa di dalam masjid itu tidak menjaganya dengan betul, atau tidak bernazir atau pun tidak berfaedah kepada masjid kalau *Mutawallī* dilantik.

Di dalam Fasal 78, majlis berkuasa, dengan sebab-sebab yang patut mengikut hukum Islam bagi menutup atau meroboh sesebuah masjid dan boleh di mana sebuah masjid yang telah dirobohkan dan tidak pula menjadi tujuan hendak mendirikannya bagi tujuan agama lain, menjual dan

mengurus tapak masjid itu tetapi hasilnya dalam penjualan itu adalah kerana mengawal, memperbaiki masjid dan kerana tidak lain-lain maksud. Kuasa yang diberi dalam Fasal 78 ini adalah sangat meragukan kerana apabila kita fikirkan banyaknya bilangan masjid di Singapura dengan banyaknya bilangan orang-orang Islam. Yang demikian ini lebih-lebih lagi akan meragukan tentang kebijaksanaan sebab kepada orang Islam, masjid adalah tempat yang suci untuk beribadah dan merobohnya, bukan sahaja telah menghapuskan wakaf-wakaf orang tetapi boleh menimbulkan sangkaan bahawa kerajaan atau majlis telah mengganggu agama mereka. Maka fasal yang demikian ini adalah menjadi bijaksana sekiranya ditiadakan. Sekiranya kuasa diteruskan maka mungkin masjid-masjid yang ada yang bakal terletak di tengah-tengah pembangunan baharu yang dikelilingi kelak oleh orang-orang yang kebanyakannya bukan Melayu seperti masjid-masjid Maarof, Sultan, Alsagoff, Malabari dan lain-lainnya akan ada jalan bagi merobohnya dengan alasan-alasan yang “**patut dan cukup**” mengikut fahaman mereka.

Selain itu adalah bermakna yang demikian akan memutuskan amal jariah seseorang yang telah berwakaf, sedang harta wakaf yang tertentu, sepanjang yang diketahui, tidak boleh diubah atau dipinda kerana ia bermakna memutuskan sama sekali hak-hak wakaf seseorang.

83 (1) bawah kuasa bagi mengelola sekolah-sekolah agama Islam akan diserahkan kepada majlis dan majlis berkuasa bagi mendaftarkan dan menguasai perjalanan sekolah-sekolah itu dan meluluskan sukatan-sukatan pelajaran di sekolah-sekolah yang tersebut. (2) Majlis berkuasa mengawasi penubuhan sebarang sekolah agama Islam persendirian (*private*) dan enggan mengizinkan sebarang sekolah-sekolah itu ditubuhkan dan untuk meluluskan peraturan-peraturan dibuat oleh barang siapa pun yang mengemudikan pertadbiran sekolah itu. (3) Berkuasa melantik pegawai awam untuk memeriksa sekolah-sekolah

agama bagi memuaskannya bahawa tuntutan majlis telah disempurnakan. (4) Majlis berkuasa memerintahkan seseorang bekerja atau yang akan bekerja sebagai guru di dalam sekolah-sekolah agama *private* menguji kelakuannya kepada lembaga yang dilantik oleh majlis dan berkuasa memberhentikan pekerjaan sebagai guru di sekolah itu.

(5) Majlis berkuasa menutup mana-mana sekolah agama yang dipandang oleh lembaga yang dilantiknya tidak memuaskan dan

(6) suatu rayuan atas langkah-langkah dan perintah atau arahan majlis di bawah ini dihadapkan kepada menteri.

84 (1) Mana-mana bantuan wang daripada kerajaan kepada sekolah-sekolah agama Islam hendaklah ditadbir oleh majlis menurut peraturan-peraturan yang dibuat oleh majlis dan disetujui oleh menteri yang bertanggungjawab di dalam pelajaran.

Di dalam Fasal 38 (1) jelas bahawa kawalan sekolah-sekolah agama, isi pelajaran yang diajarkan di sekolah-sekolah agama itu adalah di bawah kuasa majlis dan jelas bahawa *control* atas pelajaran sekolah-sekolah agama akan dilakukan dan mungkin mana-mana yang tidak sesuai difikirkan oleh kerajaan tidak sesuai dengan dasar-dasarnya seperti dalam pelajaran tawarikh, tauhid dan filsafatnya serta hubungan-hubungannya dengan politik kerana agama Islam itu tidak dapat dipisahkan dengan erti politik Islam maka tak dapat tiada kuatkuasa majlis akan dilakukan ke atasnya dan sebab itu ada moleknya dibuat (83 (1)) itu meluluskan kawalan atas soalan-soalan agama diserahkan kepada majlis dan majlis mempunyai kuasa mendaftar dan mengawal perjalanan sekolah-sekolah itu tetapi suatu badan penasihat yang terdiri dari Yang Dipertua majlis dan mufti dan tujuh orang Islam lain yang diunjuk oleh badan-badan, kesatuan-kesatuan orang Islam; dan semua isi pelajaran sekolah itu hendaklah diluluskan oleh badan penasihat itu.

Adalah ditakuti bahawa campuran kerajaan di dalam

sekolah-sekolah agama, dengan peraturan-peraturan yang dibuat oleh majlis dengan persetujuan Menteri Pelajaran itu akan menjadikan bahawa sekolah-sekolah agama hanya akan mempelajari perkara beribadah sahaja. Yang demikian ini, di dalam Persekutuan Tanah Melayu apabila Kementerian Pelajaran bertujuan mengambil alih sekolah-sekolah agama adalah dibantah oleh sekolah-sekolah agama itu kerana ditakuti bahawa sekolah-sekolah agama itu akan jadi alat-alat politik.

Nikah Kahwin

Di dalam Fasal 92 (3) sebelum mengakadkan sesuatu nikah atau memberi izin yang bertulis mengakadkan sesuatu nikah menurut pecahan (2) di dalam fasal ini [tidak boleh menikahkan seseorang lelaki yang ada mempunyai isteri kepada seseorang yang hendak dikahwininya dikecualikan oleh kadi atau kebenaran yang bertulis kepada kadi dari wali perempuan yang akan dikahwinkan itu — P.] kadi sendiri hendaklah berpuas hati serta menyiasat bahawa tidak ada halangan mengikut hukum Islam atau undang-undang ini di dalam perkahwinannya itu.

Ini adalah bermakna bahawa kuasa kadi diberi terlalu luas dan boleh menimbulkan disalah gunakan. Oleh yang demikian kepuasan hati kadi itu, menurut hukum Islam hendaklah diletakkan di dalam perkara-perkara yang tersebut di bawah ini:—

- A. Mengenai lelaki yang hendak nikah:
 - (1) Telah melayan isteri-isterinya yang ada dan anak-anaknya dengan wajar
 - (2) Sebab nikah yang hendak dilangsungkan
 - (3) Berkescanggupan membayai dengan wajarnya isteri atau isteri-isteri yang ada dan anak-anaknya menurut taraf hidupnya

- (4) Berkebolehan mengadakan perbelanjaan yang sama terhadap kepada perempuan yang hendak dinafkahinya mengikut anjuran hukum Islam
 - (5) Boleh menggiliri dan selain isteri-isterinya dengan wajar
- B. Bagi perempuan yang hendak dinikahi: Ia tidak membantah terhadap pernikahan yang hendak dilangsungkan itu.

Sekalipun dengan syarat kadi boleh mengakadkan atau memberi keizinan yang bertulis untuk mengakad, nikah yang demikian itu, sekiranya oleh sebab-sebab yang luar biasa yang diterima oleh hukum Islam maka patutlah dilakukan.

[Hendaklah diingat bahawa menurut hadith perkahwinan Islam itu tidaklah digantungkan kepada kebendaan dan perkahwinan itu adalah membawa kepada rezeki. Demikian juga sekiranya perkahwinan lebih daripada satu ini ditahan mungkin menimbulkan perzinaan dan syarak mengingatkan bahawa menjauhkan mudarat hendaklah didahulukan daripada mengambil manfaat dan kerana itu dasar-dasar di dalam persoalan ini mustahak diselidik dengan saksama kerana Islam tidak membenarkan pinjam-meminjam isteri atau melakukan perzinaan.

— P.]

Di dalam Fasal 92 (4) akad nikah tidak boleh dijalankan sekiranya pada hari nikah itu sesuatu pihak di bawah umur 15 tahun. Di dalam soal ini diberi perkecualian kadi boleh menikahkan seseorang perempuan yang berumur di bawah 15 tahun yang sudah baligh di dalam keadaan yang istimewa.

Syarak adalah menentukan bahawa seseorang yang telah akil baligh boleh dinikahkan. Umur tidak menjadi sebab dan sekiranya diletakkan umur, melihat keadaan sekarang, mungkin akan banyak timbul anak haram kerana

banyak daripada gadis-gadis yang berumur belasan tahun sudah pandai berfoya-foya dan banyak terjadi kejadian-kejadian yang tidak diingini, ibu bapa tidak dapat menikahkan mereka sebelum terjadi perkara-perkara yang tidak diingini itu sebab terikat dengan undang-undang tidak boleh kahwin di bawah umur 15 tahun. Sebab itu persoalan ini tidak boleh diikat sedang perkahwinan di bawah 15 tahun itu jarang pula berlaku di dalam golongan keluarga-keluarga yang biasa.

98 (3) mengandungi seorang kadi tidak boleh mendaftarkan sebarang perceraian atau rujuk kecuali ia berpuas hati setelah menyiasat kedua pihak suami dan isteri telah bersetuju. Di dalam hukum-hukum Islam tidak ada meletakkan cerai dan rujuk bergantung kepada persetujuan isteri dan perkara tidak boleh mendaftarkan cerai dan rujuk dengan tiada persetujuan isteri itu adalah tidak diharuskan oleh hukum Islam. Kerana itu persoalan ini mestilah tidak ada tegahan di dalamnya dan kerana itu molek dibuat "seorang kadi atau naib kadi hendaklah mendaftarkan tiap-tiap cerai atau rujuk yang sah menurut hukum Islam sekalipun telah nyata sesudah disiasat kedua-dua pihak tidak dapat bersetuju atas perkara yang timbul dengan terjadinya perceraian atau rujuk. Tetapi mendaftaran² ini hendaklah disyaratkan tidak menjadi halangan terhadap kepada tuntutan-tuntutan salah satu pihak yang berhak menuntutnya menurut hukum Islam.

Di dalam Fasal 98 (4) seseorang kadi tidak boleh mendaftarkan sesuatu perceraian dengan talak tiga. Perkara yang demikian adalah merintang hak-hak perceraian seseorang suami walau dengan apa corak dan jenisnya sekalipun dan kerana itu hendak seseorang kadi mendaftarkan perceraian dengan tiga talak menurut hukum Islam.

² Perkataan sebenar ialah pendaftaran.

Harta.

Dalam Fasal 101 (2) C. adalah menghendaki atas wasiat orang Islam yang meninggal dan di dalam Undang-undang Wasiat (*Will Ordinances*) meletakkan suatu syarat bahawa wasiat yang dibuat oleh seseorang ialah yang berumur di bawah 21 tahun tidak sah. Menurut hukum syarak seseorang yang akil baligh apabila melakukan wasiat maka wasiatnya diiktiraf sah. Kerana itu maka di dalam bahagian itu patut ditambah dengan "syarat bahawa seseorang Islam berhak membuat wasiat apabila ia telah akil baligh menurut hukum Islam elok timbangannya (*wushūd*)".

Di dalam Fasal 110 (1), dalam soal pengganti milik dan warisan kitab-kitab yang dinyatakan itu semuanya berbahasa Inggeris dan moleknya di situ tempat *murajaah* diterangkan boleh diambil hukum-hukumnya yang terdapat di dalam semua kitab-kitab Islam yang diiktiraf oleh Empat Mazhab dan selainnya ia dapat diterima di dalam hukum Islam dan Fasal 110 (2) menteri atas nasihat majlis dengan pemberitahuan dari warta kerajaan meminda atau menambah senarai buku-buku yang tercatit di dalam pecahan itu tidaklah mustahil apabila di dalam pecahan 101 dibukukan untuk *murajaah* kitab-kitab yang lain.

Di dalam Fasal 113 (1) ada menyebutkan bahawa apabila seorang isteri seorang Islam meninggalkan harta dan meninggalkan anak lelaki di atas 21 tahun bolehlah anak itu mengambil kuasa mentadbirkan estet ibunya daripada suaminya dan suami berhak kemudian daripada anak lelaki itu dan seterusnya. Syarat umur 21 tahun itu adalah bukan syarat Islam kerana Islam menghendaki ialah akil baligh dan kerana itu akil baligh hendaklah mengantikan syarat 21 tahun.

Fasal 113 (4) bagi orang-orang Islam tidaklah patut diadakan.

Di dalam fasal mengenai muallaf tidak didapati

jaminan bagi hukum mengenai diri di dalam perkahwinan seseorang muallaf dan sebab itu mustahak diadakan seseorang yang bukan Islam memeluk Islam maka jika mengenai diri dan hukum perkahwinannya hendaklah ditentukan oleh hukum Islam dan syarat-syarat dalam Piagam Wanita tidak dikenakan di atas muallaf itu.

Fasal 136 mengenai hukuman terhadap orang-orang tidak membayar zakat dan zakat fitrah, hukuman-hukuman seperti itu dipandang sangat berat kerana negara Singapura bukanlah negara Islam.

Fasal 137 seseorang yang mencuaikan atau melalaikan mereport langkahnya memasukkan seorang Islam orang itu boleh dihukum denda tidak lebih daripada \$500 atau dipenjarakan tidak lebih daripada 6 bulan dan atau dijatuhkan hukum kedua-duanya — denda dan penjara mengislamkan orang ini suatu kewajipan maka hukuman terlambat menyampaikannya sebegitu berat. Semolek-moleknya sebelum dituduh, hendaklah orang yang mengabaikannya itu diberi amaran oleh majlis.

Inilah serba sedikit perkara yang mustahak diperhatikan oleh kaum Muslimin di dalam rang undang-undang ini dan ada moleknya soal-soal seperti ini dikaji bersama dan dikemukakan bersama oleh badan-badan Islam di dalam satu memorandum yang satu sebagai maksud dan tujuan bahawa itulah yang dikehendaki oleh seluruh umat Islam di Singapura yang akan terbabit di dalam Rang Undang-undang Islam ini.



Kitab *Sabil al-Islām fī sharḥ bulīgh al-marām* sebuah kitab hadith yang terkenal telah dicap bersama terjemahannya dan penerangannya ke dalam bahasa Turki oleh Ahmad Dabu Doghi, seorang kelulusan Jāmi‘ah al-Azhar yang sekarang jadi guru di sekolah tinggi Islam di Istanbul.

kemudian, kerana perkara yang demikian itu akan menjadi kutu embun berserak di jalan dan bakal menjadi calon “makan tanggung”.

* * *

Di dalam soal mengenai bayaran belajar, A. Khir menyatakan bahawa langkah Singapura itu kononnya menjaga kehidupan (*survival*) Singapura. Alasan ini menurut A. Khir tidaklah tepat kerana mungkin orang lain juga boleh membuat cara itu, cara menjaga kehidupan terhadap Singapura tetapi kerana mereka lebih bertimbang rasa maka tidaklah mereka berbuat demikian. Beliau seterusnya menyatakan penuntut-penuntut Singapura dan anak-anak dari rakyat Singapura di sekolah-sekolah Malaysia akan diberi layanan yang sama seperti penuntut-penuntut Malaysia yang lain dengan memandang bahawa pelajaran adalah hak asasi (*birth right*) setiap kanak-kanak tidak dikira dari mana mereka datang. Perkataan ini adalah seolah-olah satu pukulan yang keras terhadap kepada dasar Singapura berkenaan dengan pelajaran itu dan akan lebih pahit lagi dengan adanya peraturan-peraturan kerja yang sedang berjalan yang mungkin akan menimbulkan api di dalam sekam bukan saja atas yang terkena tetapi dirasa pula oleh kaum kerabat dan kaum keluarga mereka yang menjadi rakyat Singapura. Hal itu wajib diperhati dengan saksama kerana yang demikian bukan saja menerbitkan permusuhan di antara kerajaan dengan kerajaan tetapi menimbulkan, menurut pendapat kita, perasaan tidak senang dari rakyat itu sendiri terutama mereka yang siuman fikirannya.

* * *

Tiap-tiap pemimpin rakyat daripada Menteri Pelajaran terutamanya sehingga kepada menteri-menteri yang lain sentiasa menggesa pemuda-pemuda supaya belajar sehingga ke sekolah tinggi

ataupun menuntut pelajaran sehingga ke luar negeri.

Seruan yang baik ini adalah patut disambut dengan wajar oleh tiap-tiap seorang tetapi ada memusyikikan ibu bapa yang cintakan agama dan adat istiadatnya banyak yang menyesal memasukkan anaknya ke sekolah tinggi sekalipun sesudah sekolah tinggi itu mereka menjawat jawatan yang baik, gaji yang lumayan, tetapi banyak yang akhlaknya kurang. Banyak yang sudah tidak tahu membaca Qur'an dan tidak tahu mengaji dan tidak berakhlik lagi sebagai akhlak Islam yang patut dijunjung ibu bapa mereka, yang menyusui, membela dan memeliharanya, memberi pelajaran dan seumpamanya akhirnya dipandang mereka seorang yang kolot, tidak berkelayakan dan melupakan sekali kehormatan kepada ibu bapa hingga pernah di antara mereka yang berkata, janganlah menyekolahkan anak tinggi-tinggi lagi, akhirnya makan hati disebabkan anak-anak itu sendiri tidak beradab tertib, menuakan mana yang tua yang lebih dahulu merasai garam daripadanya. Di dalam sekolah-sekolah tinggi pelajaran sains dan seumpamanya menjadi mata pelajaran yang utama tetapi persoalan akhlak dan budi pekerti yang menjadi dasar agama yang utama hampir-hampir tidak menjadi mata pelajaran yang tersusun baik dan ditunjukkan dengan amalan sedang Rasulullah (S.A.W) sendiri menyatakan beliau diutus adalah membawa akhlak yang mulia. Di dalam masyarakat kita lihat, kebanyakannya, makin tinggi pelajaran kedudukan seseorang orang kita makin lupa daratan dan ada setengah-setengahnya buruk langsung akhlaknya sama ada dalam pergaulannya di luar atau di dalam rumah tangganya. Berdasarkan dengan Islam menjadi agama rasmi dan untuk membentuk suatu masyarakat yang berfaedah kepada negara maka sudah wajarnya pelajaran akhlak Islam menjadi suatu mata pelajaran yang wajib bagi penuntut khususnya penuntut-penuntut Islam.

* * *

Di dalam ucapannya menyambut Hari Raya anjuran UMNO Singapura baru-baru ini, A. Mohamed Khir Johari telah menolak anggapan bahawa menyeru orang-orang Melayu bersatu dan anggota-anggota UMNO bersatu adalah sebagai seruan berunsur perkauman. Seruan itu katanya, adalah semata-mata untuk kebaikan dan bukan bertujuan tidak baik. Seruan bersatu sudah menjadi "slogan" kita sejak dulu lagi lebih-lebih lagi sekarang untuk kebaikan seluruh rakyat agar menjadi suatu bangsa yang baik.

Benar apa yang dikatakan oleh A. Mohamed Khir Johari itu tetapi tidak benar kepada orang yang hendak memecahkan persatuan orang Melayu. Apa pun yang bersifat mempertahan hak dan kedudukan orang Melayu, tuntutan yang serupa itu dikatakan mereka tuntutan perkauman dan dengan cogan perkauman itulah dari satu ke satu masa kelak orang Melayu dirampas, dari bandar terhalau ke kampung dan akhirnya berakit ke laut. Pemimpin-pemimpin Melayu sendiri tidak berani menegakkan hak Melayu sehingga apabila kongres ekonomi Melayu hendak diadakan dengan nama Kongres Ekonomi Melayu terpaksa bertukar nama dengan Kongres Bumiputra sebab pada masa itu sedikit bergerak dituduh perkauman sehingga pemimpin-pemimpin Melayu terpaksa melembutkan gigi daripada lidahnya, begitu keadaan orang Melayu.

Mahkamah-mahkamah di Morocco telah sempurna menyatakan penggunaan bahasa Arab dan bahasa Morocco sahaja di dalam mahkamah-mahkamah di sana mulai dari 1 Januari 1966. Dahulunya mahkamah-mahkamah itu menggunakan bahasa Perancis atau bahasa Sepanyol. Hakim-hakim bangsa asing (lebih kurang 70 orang Perancis dan 20 orang Sepanyol) dikehendaki meneruskan pekerjaan mereka sebagai penasihat sehingga seratus orang hakim-hakim baru didapati.

BUKU2 RUMI

Siri Buku2 Bachaan Sekolah Rendah:

1. Tunas Baru (ABC) Abd Rahman H. Said \$1.50
 2. Tunas Baru I \$1.50
 3. Tunas Baru I, III, IV \$1.50
 4. Senang Bacha I dan II, Hassan Basri \$0.80
- b. Buku2 Bachaan Tambahan untuk Sekolah Rendah:**
1. Kuching Hitam oleh A.H. Edrus \$0.30 sen
 2. Peristiwa Hari Sabtu 30 sen
 3. Nabi Sulaiman dengan Semut 30 sen
 4. Lutong Sakti I dan II 35 sen
 5. Karun Dengan Harta-nya 35 sen
 6. Pekebun yang Tama' 35 sen
 7. Lembu Chantek 35 sen
 8. Kesah Minangkabau 40 sen
 9. Sutan Balun 40 sen
 10. Puteri Balqis 45 sen
 11. Pendudok Gua 50 sen
 12. Sebab Harimau 50 sen
 13. Cherita Burong Hantu 75 sen
 14. Nakhoda Dengan Datok Perpateh 30 sen
 15. Si-Buta 40 sen
 16. Mimpi 35 sen
 17. Si-Pengail 45 sen
 18. Sulaiman Nujum 50 sen
 19. Raja Ikan 50 sen
 20. Mangga Hikmat 75 sen
 21. Angsa dan Burong Merak 45 sen
 22. Abu Hassan Ganjal \$1.00 sen
 23. Ayam dan Musang 35 sen
 24. Raja Bersiong (A.Ghani Abbas) 45 sen
 25. Lang Dengan Ayam (Ira Mara) 30 sen
 26. Ikan Puyu 40 sen
 27. Semut Membalas Budi 35 sen
 28. Katak Yang Hina 40 sen
 29. Bangau Dengan Singa 35 sen
 30. Badak Dengan Seladang 40 sen
 31. Si-Amang Dengan Raksasa 35 sen
 32. Kijang Yang Cherdek 40 sen
 33. Pertengkaran Bangau dengan Belibis 35 sen
 34. Buaya dengan Landak 35 sen

Pesan kepada:-

QALAM

356/8 Geylang Road,
Singapura, 14.